



Kamis, 16 Januari 2025
Ogen: Jesaya 41:10



"Ola Mbiar"



W *Ola mbiar, sabab **Aku kap ras kam! Aku kap Dibatandu,** e maka ola atendu aru. **Kusampati** kam, janah **Aku mahanca kam megegeh. Kukawali** kam janah **Kukelini pe**".* Ayat enda mereken pengertin man banta, maka Tuhan Dibata si sembah kita e la pernah nundingken kita anak-anakNa. Piga-piga si megati mpeturah kebiaren bas diri manusia e me kerna: kesehaten, ekonomi, komunikasi bas jabu, pendahin, teman geluh man singuda-nguda ras anak perana, kematen kalak siikelengi kita bage pe persekolahen anak-anak. Kerina enda banci mpeturah kebiaren bas jelma. Persoalen banci saja reh nderpa kubas geluhta, pinakit banci saja engkenai kita bage pe keluarganta, ekonomi paksa enda banci saja lenga ncukupi keperluan geluhta, sekolah anak-anak banci saja lenga jelas, hubungan bas jabu/keluarga banci saja kurang ulina, pendahin anak-anak pe banci saja le bo jelassa; tapi kata Tuhan i bas Jesaya 41:10 ngataken **Aku tetap ras kam, Kukawali** dengen **Kukelini** ngataken man banta maka Tuhan tetap encikep tanta tupung kita iderpa kebiaren. Kesaksin penulis kenca ndalani sepuluhenem wari tahun 2024, lit saja sierbahanca turah kebiaren, e me litna pinakit si kin la iarpaken; amin bagi gia, penulis tetap ngataken bujur man Tuhan dengen tetap enggejapken keleng ate Dibata. Salah sada ayat bas Pustaka Si Badia guna pergegeh man penulis eme bahan paksa tenengta wari enda. **Kusampati, Kupegegehi, Kukawali ras Kukelini** perkatan enda jadi motivasi man penulis maka pinakit e la ngolangi guna ndahiken dahin pelayanen dengen kata Tuhan e jadi pergegeh kel man penulis. Kebiaren-kebiaren banci saja reh kubas tengah-tengah geluhta, lenga dung sada si man ukuren nggo ka reh si man ukuren sideban. Ola mbiar keleng ate Tuhan la pernah nundingken kita. Tetaplah nggeluh erpengarapen dengen teklah maka melala cara si ibahan Tuhan gelah kebiaren-kebiarenta salih jadi keriahen.